

Tikinnermi nioqqutissanik akitsuuteqanngitsunik eqqussisinnaaneq pillugu Namminersorlutik Oqartussat nalunaarutaat

Nioqqutissanik eqqussuineq annissuinerlu pillugit Inatsisartut inatsisaat nr. 18, 30. oktober 1992-imeersumi § 11, imm. 2, § 17, imm. 1 aamma imm. 2, § 18, imm. 2, § 35, imm. 1, aamma § 46, imm. 6, naapertorlugit aalajangersarneqarput:

Tikinnerq

§ 1. Tikinnertut nunanit allanit tikinnermut atatillugu akitsuuteqarfimmut inuttut tikinnertut paasineqassaaq, tassani Danmark Savalimmiullu ilanngullugit.

Imm. 2. Tikinnermi angalasup nioqqutissat tulluuttut amerlassusillit nassarlugilluunniit pisiarisinnaavai:

1) Arlaat:

a) Sikaritsit 200-t, imaluunniit

b) sikaat 50-it, imaluunniit

c) cigarillot 100-t, imaluunniit

d) tupat 250 g, imaluunniit

e) sukuluut snusilluunniit 250 g.

2) imusivissat immeriaannaalluunniit 200-t.

3) imigassat kimittuut 22 procentimik qaffasinnerusumik aalakoornartortalik imaluunniit hedviinni 2,25 liiteri 15 aamma 22 procentit akornanni aalakoornartortalik.

4) viinni nerriseq 2,25 liiteri 15 procent inorlugu aalakoornartortalik.

5) immiaaqqat 2 liiteri.

6) imeruusaatit kulsyrillit 2 liiterit imaluunniit imeruusaatit koffeinitallit liiterimut 150 mg-mit annertunerusumik koffeinitallit.

7) imeq imigassaq 1 liiteri.

8) sukkulaatinit mamakujuttunillu nioqqutissiat katillugit 4 kg.

9) savaaqqap savalluunniit neqaat katillugit 5 kg.

Imm. 3. Inuit 18-inik ukioqalereersimasut kisimik tupanit nioqqutissianik, imigassanik kimittuunik, viinninik immiaaqqanillu akitsuuteqanngitsunik eqqussisinnaapput.

§ 2. Nioqqutissanik § 1, imm. 2-mi taaneqartuni akitsuuteqanngitsunik tuniniaaneq mittarfinni niuertarfinnit, taamatut tuniniaasinnaanermut Akileraartarnermut ingerlatsivimmit akuersissuteqartuni taamaallaat pisinnaavoq.

Imm. 2. § 1, imm. 2-mi taaneqartutut nioqqutissanik akitsuuteqanngitsunik tuniniaaneq, akileraartarnermut ingerlatsiviup akuersineratigut onlinikkut inniminniisarneq aqputigalugu pisinnaavoq, kingornalu avataanit tikittumit nioqqutissat mittarfimmi boksimiittut, taamaallaat angalasup kode ammarsinnaasaa atorlugu aasinnaavai.

Imm. 3. Akileraartarnermut ingerlatsivik imm. 1 aamma imm. 2 malillugu akuersissutininik tunniussinermini § 1, imm. 2, § 3, imm. 1 aamma § 4, imm. 1-mi nioqqutissat taaneqartut eqqunneqarnerannut nakkutilliinermut sunniuteqartumut atugassarititaasut erseqqinnerusut aalajangersarsinnaavai.

Assartuutini sulisut

§ 3. Umiarsuarni timmisartunilu sulisut (assartuutini sulisut), umiarsuarni timmisartunilu nunat tamat akornanni ingerlaartuni sulisut, assartuutillu ingerlanneqarnerani tassaniluunniit sullissinermik suliaqartut, Kalaallit Nunaata avataani ullut unnuallu 15-init sivikinnerusumik uninngareermermi, uku nassarsinnaavaat:

1) Arlaat:

- a) Sikaritsit 60-it, imaluunniit
- b) sikaat 40-t, imaluunniit
- c) cigarillosit 50-it, imaluunniit
- d) tupat 250 g, imaluunniit
- e) snusit 250 g sukuluulluunniit,

2) hedviinni 2,25 liiteri imaluunniit viinni nerriseq 2,25 liiteri.

Imm. 2. Ullut unnuallu 15-ini ataqatigiissuni sivisunerusumik Kalaallit Nunaata avataaneereerluni tikinnermi, assartuinnermi sulisut § 1-mi malittarisassat malillugit nioqqutissanik nassarsinnaapput.

Imartani atortuni/sanaartukkani sulisut

§ 4. Imartani atortuni/sanaartukkani, tassani qilleriviit misissueqqaarnernut, ujarlernernut aatsitassanillu kulbrintinilluunniit qalluinnermi suliaqartut, akitsuuteqarfimmi nunamut niunerminnut atatillugu uku arlaat nassarsinnaavaat.:

- 1) Sikaritsit 60-it, imaluunniit
- 2) sikaat 40-t, imaluunniit
- 3) cigarillosit 50-it, imaluunniit
- 4) tupat 250 g, imaluunniit
- 5) snusit 250 g sukuluulluunniit,

Imm. 2. Akitsuuteqanngitsunik niuersinnaanermi sioqqutsisumik minnerpaamik ullut unnuallu 15-it ataqatigiissuni akitsuuteqarfiup avataaniissimanissaq piumasaqaataavoq.

Imm. 3. Imm. 1 malillugu akitsuuteqanngitsitsineq taamaallaat nioqqutissanut akitsuuteqarfiup avataani pisianut atuuppoq.

Nunani allamiut aalisariutaat

§ 5. Nunat allamiut, tassani Savalimmiormiut qallunaallu ilanngullugit, aalisariutaanni Kalaallit Nunaata imartaani aalisartuni aammalu umiarsuarni Kalaallit Nunaata imartaaniinnerminni nioqqutissanik akitsuuteqanngitsunik nassataqarnissaminnut akuerineqarsimasuni, umiarsuup inuttaanut ataatsimut ullormut unnuamullu ataatsimut amerlanerpaamik ulluni 28-ni ataqatigiissuni naatsorsuullugu nassarneqarsinnaapput viinni 1 literi, imaluunniit hedviinni 0,5 literi, imaluunniit imigassaq kimittooq 0,25 literi, imaluunniit immiaaqqat 2 literit aamma tupanit nioqqutissiat 40 g.

Imm. 2. Umiarsuarni inuttaasut, imm. 1 naapertorlugu nioqqutissanik akitsuuteqanngitsunik pissarsisimasut, akitsuuteqarfusumit aallarnissartik pissutigalugu umiarsuarmit niusimasut nioqqutissanik akitsuuteqanngitsunik § 3-mi annertussusissamut aalajangersakkat annertoqataannik, nassataqarsinnaatitaapput.

Imm. 3. Imm. 1 malillugu umiarsuarmut nioqqutissanik nassarneqartunik akitsuuteqanngitsitsineq taamaallaat nioqqutissanut akitsuuteqarfiup avataani pisanut atuuppoq.

Takornariat nunani allamiut umiarsuaannut ilaasartaatiniittut

§ 6. Takornariat nunat allamiut, tassani Savalimmiormiut qallunaallu ilanngullugit, umiarsuaannut ilaasartaatinut ilaasut umiarsuup Kalaallit Nunaata imartaaniinnerani akitsuuteqanngitsunik atugaqarsinnaatitaapput.

Imm. 2. Takornariat, imm. 1 naapertorlugu akitsuusigaanngitsumik atugaqartut, nioqqutissanik akitsuusigassanik allanik nunaliaasseqqusaanngillat, taamaallaat tupanit, sukkulaatinit aamma mamakujuttunit nioqqutissiat, nammineq atugassat. Kalaallit Nunaat aqqusaarlugu angerlamut aallarnermi takornariat § 1 naapertorlugu nioqqutissat akitsuuteqanngitsut nassarsinnaavaat.

Imm. 3. Imm. 1 naapertorlugu akitsuuteqannginnissaq taamaallaat nioqqutissanut, umiarsuup akitsuuteqarfusup avataani pisiarisimasaanut, atuuppoq.

Akitsuuteqartitsinneginnarmut tunngaviit

§ 7. §1 aamma §§-it 3 - 6 malillugit akitsuusiinnginnissamut piumasaqaataavoq pisiat inuup nammineq nassassagai angalanermiluunniit nassataminnut ilanngullugit nassassagai, taamaalilluni pisiat Akileraartarnermut ingerlatsivimmut takutinneqarsinnaaqqullugit.

Nakkutilliineq

§ 8. Suliffeqarfiit § 2, imm. 1, naapertorlugu tikittunut akitsuuteqanngitsunik nioqqutissanik tuniniaasinnaanermut akuersissuteqartut, imigassanik aalakoornartortalinnik, kiisalu tupanik nioqqutissianik tunisinerminnut atatillugu, angalasoq nunanit allanit tikinneranut uppersaasatitut boardingkortimik takutitsinissaa piumasarissavaat.

§ 9. § 2, imm. 2 naapertorlugu, suliffeqarfiit tikittunik internetikkut inniminniikkanik akitsuuteqanngitsunik tuniniaanissamut akuersissuteqartut, imigassanik aalakoornartortalinnik kiisalu tupanik nioqqutissianik tunisinermi, angalasoq nioqqutissanik inniminniinnermini pisinerminilu atiminik

angalanermullu paasissutissanik tunniussinissaa piumasarissavaat, tassani timmisartup normua ullorlu ilanngullugu.

§ 10. Angalasut tamarmik, tassani nunatsinni angalasut ilanngullugit, mittarfimmiinnerminni qinnuigineqarnerminni boardingkortimik atorsinnaasumik takutitsissapput.

Pineqaatissiissutit

§ 11. Kalaallit Nunaanni pinerluttulerinermik inatsimmi maleruagassat naapertorlugit akiliisitsinermik pineqaatissinneqarsinnaavoq:

- 1) § 1, imm. 2, § 3, imm. 1, § 4, imm. 1, § 5, imm. 1 aamma imm. 2, imaluunniit § 6, imm. 2, oqaaseqatigiit aappaanni taaneqartunit nioqqutissanik akitsuusigassaatitaasunik akuerisanik amerlanernik eqqussisoq.
- 2) § 1, imm. 3, § 2, imm. 1 aamma 2, § 5, imm. 1, § 6, imm. 2, oqaaseqatigiit siulliit, § 8 imaluunniit § 9-mik unioqqutitsisoq.
- 3) § 2, imm. 3 naapertorlugu aalajangersakkanik unioqqutitsisoq.

Imm. 2. Imm. 1-imi taaneqartutut unioqqutitsisoqarneratigut imaluunniit unioqqutitseriartoqaraluarnertigut akiliisitsinermik pillarneqaatissiilluniluunniit akiliisitsisoqanngikkaluartoq nioqqutissaq, taannaluunniit peqanngippat taassuma aningaasanngorlugu nalingata amerlaqatai, Kalaallit Nunaanni pinerluttaalisitsinermik inatsimmi malittarisassat malillugit arsaarinnissutigineqarsinnaapput.

Imm. 3. Imm. 1 malillugu akiliisitsinerit Nunatta Karsianut nakkartinneqartassapput.

Imm. 4. Imm. 2 malillugu arsaarinnissutit Nunatta Karsianut nakkartinneqartassapput.

Atuutilerfik

§ 12. Nalunaarut una ulloq 27. november 2024 atuutilissaaq.

Imm. 2. Tamatumunga peqatigitillugu tikinnermi nioqqutissanik akitsuuteqanngitsunik eqqussisinnaaneq pillugu nalunaarut nr. 6, 13. marts 2023-meersoq atorunnaarsinneqarpoq.

Kalaallit Nunaanni Namminersorlutik Oqartussat, ulloq 19. november 2024

Erik Jensen (atsior.)

Aningaasaqarnermut Akileraartarnermullu Naalakkersuisoq

/ Nikolai S. Christensen (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut